

In mais da pais

Las lingias grassas e finas dal schaner 2021

DAVID TRUTTMANN/FMR

L'onn 2021 ha cumenzà sco ch'il vegl ha finì – cun virus, distanza, mascrinas. Insumma: pauc lustig. Però cumenzain a l'entschatta.

I pli impurtant al cumenzament: Il Grischun ha cumenzà – sco ils auters chantuns – a vaccinar sistematicamain encunter il coronavirus. L'emprim èn vegnids vidlonder ils cussadents e las cussadentas en las chasas d'attempads. Ussa vegnan vaccinadas pass per pass las persunas las pli veglias u las persunas da ristg. Insumma, avant in onn, sche duas persunas sa scuntravan casualmain per via en vischnanca, alura devi in simpel discurs da mintgadi: «Co vai?» – «Bain, e cun tai?» – «Flotta aura per ir a spass?» etc. A partir da quest onn, tuni uschia: «Has ti schon fatg la squitta?»

Per il mund rumantsch ha quest onn en mintga cas cumenzà empermettent. Pertge? Nus existin anc! Silmain en la statistica da l'Uffizi federal da statistica. Tenor il rapport preschentà quest mais han anc 0,5 pertschient da las Svizras e dals Svizzers inditgà il rumantsch sco lingua principala – e perfin 0,9 pertschient da la populaziun dovra regularmain il rumantsch en il mintgadi. Quai è bain grondius! Nus essan anc gronds avunda per betg svanir or da la statistica. E surtut cuntengnan quellas cifras anc bler potenzial vers ensi. Cun pazienza, scharm e perseveranza vegnin nus segir da rumper in bel di la «quota da reproducziun» dad 1 pertschient.

Per ils Tuatschins ha l'onn cumenzà cun in nausch witz en connex cun il traffic public. Gia avant onns avevan els stuì magunar che lur «Furka-Oberalp-Bahn» mida num e daventa la «Matterhorn-Gotthard-Bahn». Schegea ch'il Matterhorn e surtut il Gottard vesan ils trens cotschens mo da lunsch. Alura è capitada tut l'istorgia cun la Porta Alpina ch'ha fatg naufragi. Ed ussa la pli nova schleppa tar il traffic public: A partir dal 2023 na datti pli nagin transport d'autos cun il tren sur l'Alpsu. E sch'in bel di vegn a svanir era il tren sur il pass, alura han ils Tuatschins per fortuna anc la davosa opziun: ir cun skis tras la «SkiArena Andermatt-Sedrun» en fin vi Ursera. En mintga cas èsi cler per ils Tuatschins: Bler pli gurent ir cun skis sur il culm che stuaier ir ora Mustér.

En il Grischun Central èsi da decider, sch'ins vul cuntinuar cun il Parc Ela u betg. Il parc da natira datti dapi diesch onns ed ussa avessan las vischnancas da prolungar il contract. Tschintg da las ses vischnancas han gia ditg gea, senza grondas discussiuns. Uschia ch'il parc po en mintga cas cuntinuar. Ma ussa manca be anc il Cumegn Surses. E là datti exact las medemas discussiuns sco avant

10 onns, cura ch'ins ha clamà en vita il parc. La dumonda neuralgica: È in territori da skis cumpatibel cun in parc – ed è in parc cumpatibel cun in territori da skis? La vischnanca decida en trais emnas a l'urna. Però ristgain gia ussa ina prognosa, independent dad in «ea» u dad in «na»: En diesch onns, dal 2031, cura ch'i va per prolungar puspè il contract, vegn debattada en il Surses anc ina giada exact la medema dumonda – territori da skis u parc? E dal 2041 er puspè. Dal 2051 er.

Ils da Breil vulan embellir lur baselgia cun in grond maletg da l'artist grischun Robert Indermaur. Ma avant che dar en incumbensa quell'ovra, dumonda la plaiv il parairi dals parochians e da las parochianas, cun in feagl sgulant. Però adatg cun inquietas en dumondas d'art. Pertge? En las gratulaziuns dal Radio Rumantsch vegn gea giavischè regularmain musica. E tenor la statistica dad RTR èn ils suandants artists sin las emprimas trais plazzas da la hitparada rumantscha da l'onn passà: 1. «Sontga Maria» da Theophil Klais – 2. «Mumma» da Giganto e Mattiu – 3. «Pel cumplion» dals Jauers Arno ed Aldo. Insumma, nus na vulain betg metter en dumonda la qualitad artistica da quella musica fitg populara tar Rumantschas e Ru-

mantschs. Ma lain dir uschia: Quel gust da musica polarisescha! Schegea che da sunar la «Sontga Maria» da Klais ina giada cun l'orgla da baselgia da Breil fiss bain er ina bun'idea.

Punctualmain cun l'entschatta dal lockdown è vegnida la naiv. La dunna Holla – sco ina columnista da la FMR ha remartgà dacurt – è stada pli effizienta cun far star a chasa la gliעד che tut ils placats e cumonds e scumonds. Pelvaier – cun tut las midadas a la testa da l'Uffizi federal da sanadad da quest onn valessi propi la paina da dumandar ina giada la buna dunna Holla, sch'ella avess forse anc mustgas da surpigliar quest uffizi.

Tar l'Institut Otalpin a Ftan ha entschet l'onn quasi sco mintg'onn dapi il 2000 – cun in avegnir intschert. Entant che l'onn passà era la scola gimnasiala en tschertga da scolaras e scolaras or da pajais asiatics, sto ella ussa ir a la tschertga dad in nov directori, dad in/a nov/a president/a e gist era dad in/a vicepresidente/a dal cussegl d'administraziun. Ina gronda roschada. Però atgnamain è gia pront in candidat per tut ils trais uffizis: Marco Cortesi, il pledader da medias da la Polizia da Turitg, oriund da Samedan, va proxima-

main en pensiun. E Cortesi è gea l'um ideal per Ftan – el enconuscha l'Engiadina, sa la lingua, e surtut è el disà cun alarms, problems, medias e sceptica envers las autoritads.

Chalà avant ch'entschaiver – Cquai ha fatg in supstant elegi en Lumnezia. El è sa retratg da l'uffizi communal avant che insumma entrar en quel. Sco la FMR ha scrit è la raschun detg simpla: «Sia capientscha dil lungatg romantsch seigi buca sufficienta, ed aschia sesenti el buca capabels da menar in departament.» Uschia ch'i dat bainbaud in nov slogan da la Lia Rumantscha per promover il rumantsch: «Tgi che sa rumantsch, sa ir en supstantza.»



1864:
Ils emprims turists englais rivan a San Murezzan. Ed els restan. Cun gust! Il turissem d'enviern è naschi.



ILLUSTRAZIUN JON BISCHOFF

2021:
Il coronavirus englais riva a San Murezzan. Ed ils turists ston restar. Cun pauc gust (en bucca). Ed il turissem d'enviern va da l'ana giu...?



Il mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en il Grischun ed insumma? Quai sa dumonda la redacziun da la FMR mintga fin dal mais. Tge paisa e tge paisa mo in zichel? Nus laschain reparar schabetgs, dain ina survista casuala ed commentain quai cun in surrir. Mais per mais illustrescha il Bregagliot rumantsch Jon Bischoff il «mais da pais» cun in schurnal grafic.